

## **Tangguh HSR: Malaysia tidak perlu bayar pampasan - Azmin**

**Astro Awani**

**17 Jun 2020**

**Harits Asyraf Hasnan,**

KUALA LUMPUR: Malaysia tidak perlu membayar sebarang pampasan kepada Singapura atas penangguhan projek Kereta Api Berkelajuan Tinggi Kuala Lumpur–Singapura (HSR).

Menteri Perdagangan Antarabangsa dan Industri (MITI), Datuk Seri Mohamed Azmin Ali berkata persetujuan secara bersama itu dicapai kedua-dua negara sebelum ini.

Jelasnya, pasukan teknikal dari kedua-dua negara akan berjumpa selepas Hari Raya untuk membincangkan aspek teknikal projek mega tersebut.

"Secara prinsip, kita telah bersetuju bahawa projek ini memberi manfaat kepada kedua-dua negara, tapi kita kena duduk bersama untuk berbincang isu teknikal.

"Jadi kita perlukan lebih sama (untuk berjumpa) sekiranya kita boleh putuskan segala pelaksanaan dalam tiga atau empat bulan lagi, pastinya kita akan berjumpa lagi," katanya.

Beliau berkata demikian ketika ditemui media selepas menyempurnakan Majlis Anugerah Perkhidmatan Cemerlang MITI di sini hari ini.

Pada 31 Mei lalu, Kerajaan Malaysia dan Singapura mengumumkan penangguhan projek bilateral bernilai RM110 bilion itu sehingga 31 Disember 2020.

HSR sepanjang 350km itu bakal mengurangkan tempoh perjalanan antara Kuala Lumpur dan Singapura kepada 90 minit.

**© 2020 Astro Awani Network Sdn. Bhd.  
(535275-D) All Rights Reserved.**

Source: <http://www.astroawani.com/berita-malaysia/tanggung-hsr-malaysia-tidak-perlu-bayar-pampasan-azmin-247618>